

I te pito ki Parihaka o te Kaute o Taranaki, i uaua te mahi i runga i te kore kaore nga Maori o reira e whakaatu atu mai i nga mea e patairia ana, a i pera anc nga Maori o Parihaka i rokohanga e nga tepute-kai-tatau ki etahi atu kainga.

Ko te pito ki Mokau o toku takiwa i tukuna atu e au ma nga tepute-kai-tatau i raro i a Wiremu H. Kerehi e mahi, a ko nga Maori o Waitotara i rokohanga ki runga o Wanganui, i tukuna atu e au ma nga tepute-kai-tatau i raro i a Te Paramena, i te kai-tatau mo Whanganui Kaute, e mahi.

Kaore kau he mate uruta i pa mai ki nga Maori o toku takiwa.

Ki taku mohio kei te tika te tatau o nga Maori o toku takiwa, e ata whakaaturia na e nga pukapuka ka tukuna atu nei ki koe. Ko nga korero kua tuhia atu na mo nga mahinga kai me nga whenua kua ruia ki te karaihe kaore pea i te tino tika i runga i te uaua o nga Maori ki te whakaatu atu mai i nga maara me nga mahinga a ia tangata.

I roto i nga pukapuka mo te Kaute o Stratford ka kitea he maha nga Maori kei reira, he mea haere atu i Parihaka ki te mahi purapura karaihe ki te koha hakeke.

I te taha ki Parihaka tera e kitea kua tokoiti iho nga Maori o reira i te mea he maha nga tangata kua taki hokihoki ki o ratou kainga i Mokau i Waikato i whea atu.

Heoi naku, na

THOMAS W. FISHER,

Kaiwhakahaere mo nga Rahui o te Tai Hauauru.

Ki te Hekeretari o Raro, Tari mo nga Tikanga o te Ture, Poneke.

No. 9.

Mr. BRABANT, S.M., ki te Tari mo nga Tikanga o te Ture.

E HOA,— Tari o te Kaiwhakawa Tuturu, Whanganui, 16 o Mei, 1896.

Ka whai honore ahau ki te whakaatu ki a koe, i runga i to whakahau, kua tauria e au nga Maori o nga Kaute o Whanganui, Rangitikei, Oroua, Kiwitea, Pohangina, Manawatu, me Horowhenua, a tenei ka tukua atu e au te pukapuka whakawhaititanga a te kai-tatau o te maha o nga Maori o aua takiwa.

I nui rawa te uaua o te mahi i tenei tatautanga te take he kore kaore nga Maori e tahuri mai ki te tautoko i taua mahi, tetahi ko etahi o nga Maori i tahuri tonu mai ki te puru i taua mahi, a ko tetahi hoki he kore kaore e kitea ana etahi tangata matau ki taua tu mahi hei tepute-kai-tatau. Ki te tirohia te whakawhaititanga o nga pukapuka tatau tera e kitea kua neke ake te maha o nga Maori i roto i enei kaute. Me ata whakaatu atu ahau ki a koe kua neke rawa ake te maha o nga hawhe-kaihe i roto i enei takiwa.

Kei te mau tonu te haere a nga Maori o te Tai Hauauru ki te kainga o te Whiti i Parihaka.

Heoi naku, na

HERBERT W. BRABANT,

Kai-whakawa Tuturu.

Ki te Hekeretari o Raro, Tari mo nga Tikanga o Te Ture, Poneke.

No. 10.

Mr. HUTCHISON, S.M., ki te Tari mo nga Tikanga o te Ture.

E HOA,— Mahitaone, 16 o Aperira, 1896.

E whai honore ana ahau ki te tuku atu ki a koe i te pukapuka whakawhaititanga i te tatau o nga Maori o nga Kaute o Wairarapa-ki-te-Tonga, Wairarapa-ki-te-Raki, me Pahiatua. Ko nga pukapuka a te tepute-kai-tatau mo Wairarapa-ki-te-Tonga kua whakariteritea ki nga pukapuka tatau a te tepute-kai-tatau mo te takiwa o Hutt, i te mea e piri ana nga rohe o aua takiwa, kia kitea ai tena ranei i rua tatautanga o etahi tangata. Otira mo te taha atu ki Pahiatua kihai taua tikanga i taea te whakahaere, i te mea kua whakaatu mai a Mr. Turnbull ki au kaore kau he Maori i tauria e te tepute-kai-tatau mo Wurupere. E tino mohio ana ahau kei te tika te tatau a aku tepute-kai-tatau i nga Maori o te Kaute o Pahiatua.

I te mea kaore kau he tari rehitatanga mo nga Maori na reira kaore e mohiotia tikatia te maha o nga mea whanau hou mai o nga mea ranei kua matemate atu i roto i nga tau e rima kua taha ake nei; a he putake tika tenei, ara, te kore tari rehita mo nga Maori, hei hurihuri ma te Kawanatanga, a ka whakatu ai i tetahi tari pera mo Wairarapa. Ko tetahi kaore kau i au nga pukapuka o era tatautanga o mua atu i tenei, na reira kaore e taea e ahau te whakariteritea kei te nui haere ranei te tupu o nga Maori o tenei takiwa kaore ranei; otira ki taku titiro kei te mau tonu ki te ahua kotahi, ara, kaore i te nuku ake kaore i te hoki iho; a i te mea kaore nga Maori o konei e pangia ana e nga mate uruta, a kaore hoki i tupono ki tetahi mea ke atu hei patu i a ratou, kaati kotahi tonu te ahua hei tatutanga mo te whakaaro, ara, tena e hoki haere te maha o nga Maori o tenei takiwa.

Kua ki ake nei au kaore nga Maori o Wairarapa e pangia ana e nga mate uruta, engari nga mate wharowharo me nga mate huango, kei a ratou ena. Te take i nui ai enei mate ki a ratou he kino no ta ratou whakahaere i o ratou kainga, notemea ahakoa te nui o te kai ki a ratou me te papai o a ratou kai, ko nga paru me nga mea pirau o nga kainga kaore e tahia atu ana, a ko tetahi kei te tino kuare nga Maori ki te whakahaere i roto i o ratou whare, e whawhao nei kia maha noatu ki roto i te ruma kotahi moe ai.

*

*

*

*

*

*

Heoi naku, na

T. HUTCHISON,

Kai-whakawa Tuturu.

Ki te Hekeretari o Raro, Tari mo nga Tikanga o te Ture, Poneke.